

FESTA FEDERALE DA TIR



La Patrouille Suisse ha impressiunà cun ina show aviatica sur la citad e davant las muntognas.



FOTOS OLIVIA AEBLI-ITEM/SOMEDIA



Durant il til tras la citad da Cuira han 1000 personas preschentà usits, tradiziuns, culturas ed il tir.



Til da tir cun usits, tradiziuns e culturas

Tradiziun, collegialitad, plaschair dal tir e cultura svizra. Quai è la versiun curta dal til da la Festa federala da tir 2026 a Cuira. Da la partida sonda passada è stada blera prominenza politica, tranter auter era cusseglier federal Martin Pfister.

GION NUTEGN STGIER/FMR

RG

Anc dura la Festa federala da tir 2026 en il Grischun trais emnas, ma ina da las culminaziuns da la festa è stada sonda pasada a Cuira: Il til tras la chapitala grischuna cun blers bels motivs, numerusas colurs, personas da la politica naziunala, chantunala e regionala, musica, bandieras senza fin ed ina rotscha tiradurs e tiraduras da l'entira Svizra.

Tir e til internaziunal

1000 participants e participantas han preschentà en sun e tun, en maletg e costumes pumpus usits, tradiziuns, culturas e sa chapescha er il tir. Per lung da la via dal til ha blera glieud persequità l'occurrenza. Onur als organisaturs da la Festa federala da tir 2026 han fatg numerusas associaziuns da tir chantunalas e naziunalas e schizunt uniuns da l'exteriur, da l'Euro-

pa, dals Stadis Unids da l'America, dal Canada e da l'Africa dal Sid.

Bandiera resta quatter onns en il Grischun

L'act festiv ha gi lieu l'avantmezdi a l'Obere Au a Cuira cun la surdada da la bandiera da l'Associaziun svizra da tir. Dapi il 2020 è quella stada en mauns dal comité d'organisaziun da la davosa Festa da tir federala a Lucerna. Per ils proxims

quatter onn resta la bandiera en il Grischun. A l'act festiv èn pliras personas vegnidas a pled, tranter auter cusseglier naziunal Martin Candinas. El stat a la testa dal comité d'organisaziun da la Festa federala da tir en il Grischun. Era discursi a la gronda raspada han il cusseglier federal Martin Pfister, il president dal Cussegl dals chantuns Stefan Engler ed il president dal Cussegl naziunal Pierre-André Page. Il salid da la regenza grischuna è vegnì da cusseglier guvernativ Martin Bühler. La finiziun da l'act festiv a l'Obere Au ha fatg la Patrouille Suisse cun ina show aviatica cun loopings e sgols en furmaziun.

Bandierel è per ils proxims quatter onns Attilio Tam, in tiradur cun corp ed olma da Malögia. La proxima Festa federala da tir duai avair lieu l'onn 2030 en il chantun Vad ubain en il chantun Neuchâtel.



Il president dal comité d'organisaziun da la Festa federala da tir 2026 Martin Candinas (san.) cun Claudio Casanova, il president da la Festa federala da tir 1985 a Cuira.



Prominenza politica a Cuira sonda passada (da san.): Stefan Engler, president dal Cussegl dals chantuns, Martin Pfister, cusseglier federal, Pierre-André Page, president dal Cussegl naziunal, e Martin Bühler, president da la regenza grischuna.



Il schef da l'armada svizra Benedikt Roos (san.) cun Carl Frischknecht, il secretari general da la Festa federala da tir 2026.



Era stada a la festa uffiziala è la tiradura internaziunala Annina Tomasschett.



Arthur Buchli da Stussavgia è cun 95 onns il pli vegl participant da la Festa federala da tir 2026. El ha fatg otg cranzs.



Musicalmain embelli la festa ha la Compagnia Rossini.

FOTOS GION NUTEGN STGIER